

ՔԱՂԱՔՆԵՐԻ ԴԵՐԸ ՏՆՏԵՍԱԿԱՆ ՇՐՋԱՆՆԵՐԻ ԿԱԶՄԱՎՈՐՄԱՆ ԳՈՐԾՈՒՄ

Մ. Բ. ՀԱԿՈԲՅԱՆ

Տնտեսական շրջանների առանձնացման ժամանակ կարևոր դեր են խաղում հատկապես խոշոր և միջին մեծության քաղաքները: Ներհանրապետական տնտեսական շրջանների համար, որոնք աչքի են ընկնում փոքր չափերով և տնտեսության ավելի նեղ մասնագիտացմամբ, մեծ նշանակություն ունեն տնտեսական կենտրոնների առկայությունը և դրանց ձևավորումն ու զարգացումը: Այդպիսիք են խոշոր և միջին մեծության քաղաքները, որոնք աչքի են ընկնում արդյունաբերության ու տրանսպորտի զարգացմամբ, առևտրա-բաշխողական ցանցով, կուլտուր-կենցաղային ձեռնարկություններով ու այլ հաստատություններով: Քաղաքների տնտեսական շրջան կազմավորող դերը ցցուն կերպով երևում է քաղաքային բնակավայրերի շրջանային համակարգերն ուսումնասիրելիս: Քաղաքները շրջանային այդ համակարգերի սահմաններում պետք է դիտել իբրև կետեր, որտեղ հանգուցվում են զանազան տարածքների սոցիալ-տնտեսական կապերը:

Սովետական անտեսա-աշխարհագրական գրականության մեջ կան քաղաքների (խոշոր, միջին, փոքր) շրջան կազմավորելու դերի վերաբերյալ զանազան տեսակետներ: Ն. Բարանսկու կարծիքով՝ «քաղաքները գյուղատնտեսության հետ անմիջական կապ չունեցող բնակչության կուտակման կենտրոններ են, որ աճել են ի հաշիվ ոչ գյուղատնտեսական ճյուղերի՝ արդյունաբերության (ներառյալ արհեստը), առևտրի, տրանսպորտի, գյուղական զանգվածների բաժանման հաշվին, ինչպես նաև ոչ տնտեսական՝ վարչական, ռազմական, մշակութային (այդ հասկացությունների ամենալայն իմաստով) դերի հաշվին: Շատ դեպքերում, հատկապես սահմանային գոտիներում, քաղաքները ծագել են սկզբնապես որպես ամրացված տեղեր, ամրոցներ»¹: Ն. Բարանսկին գտնում է, որ «քաղաքը հանդիսանում է այդ շրջանի ձգողության կենտրոնը, նրա դերը ամենից առաջ և ամենից հաճախ առևտրական և արդյունաբերական է, ապա նաև վարչական ու մշակութային»²:

Քաղաքը համանման ձևով է բնութագրել նաև Բ. Խորևը. «Քաղաքը, — գրում է նա, — միաժամանակ բնակեցման կենտրոն է ու աշխատանքային ռեսուրսների թանձրուկ, և՛ արդյունաբերության տեղաբաշխման վայր, և՛ տրանսպորտային ցանցի հանգույց, և՛ շրջակա տարածքի վարչական, տնտեսա-կազմակերպչական, առևտրա-բաշխողական, կուլտուր-կենցաղային կենտրոն»³: Ն. Սիլակի կարծիքով՝ «միջին քաղաքը դա աշխարհագրական կետ է, որտեղ առկա են օբյեկտիվ պայմաններ նրանում ամենաարդյունավետ արտադրական համալիր, միարևույթ խո-

¹ Н. Н. Баранский, Экономическая география. Экономическая картография, М., 1960, стр. 172.

² Նույն տեղում, էջ 175.

³ Б. С. Хорев, Пути развития малых и средних городов, М., 1966, стр. 24.

շոր ձեռնարկությունների տեխնոլոգիական ու տնտեսական փոխադարձ կապ ստեղծելու համար: Միջին մեծության քաղաքը կարող է դառնալ արտադրության համակցման օջախ, տեղական արտադրական փնջի գլխավոր ձեռնարկության խարսխման կենտրոն⁴: Շարունակելով իր միտքը, նա գրում է. «սովորաբար նման քաղաքը օժտված է վարչական իրավասություններով, հանդիսանում է մշակույթի և շրջանի համար կադրեր պատրաստելու կենտրոն»⁵:

Վերը նշված բնութագրումները և փաստական նյութերը բերում են այն եզրակացության, որ քաղաքների տարածքային ազդեցության գոտին կախված է դրանց տնտեսական զարգացման մակարդակից, արդյունաբերության կառուցվածքից, ինչպես նաև արտադրական ու ոչ տնտեսական կապերի շափերից և ուժգնությունից: Սակայն չպետք է մոռանալ և այն, որ մյուս հավասար պայմաններում որքան քաղաքը մարդաշատ է, այնքան լայն է նրա ազդեցությունը: Քաղաքը սերտ կապի մեջ է գտնվում շրջակայքի հետ և դրանց փոխադարձ կապի լուսաբանումը ունի մեծ նշանակություն ներհանրապետական տնտեսական շրջանացման, շրջանների համալիրային զարգացման և հենց քաղաքների հետագա աճի հեռանկարներն ուրվագծելու համար: Ըստ Խ. Ալեքսանդրովի՝ «Մեծ և միջին մեծության քաղաքները, իբրև տնտեսական համալիրային նշանակալի կենտրոններ, բազմակողմանի ազդեցություն են թողնում շրջակայքի վրա: Նրանք դեպի իրենց են ձգում բնակչությանը, հաղորդակցության ճանապարհները, պայմանավորում են արդյունաբերական նոր ձեռնարկությունների ծագումը, ստեղծում են վաճառահանման շուկաներ և հենց դրանցով ձևավորում են գործադրում տնտեսական այնպիսի պրոցեսների վրա, որոնք անմիջական կապ չունեն բուն արտադրության հետ»⁶:

Նշված տնտեսական ազդակների հետևանքով շատ քաղաքներ դառնում են վարչական և տնտեսական-կազմակերպչական կարևոր կենտրոններ: Այնտեղ կուտակվում են առևտրական, կուլտուր-մշակութային, ուսումնական և բուժական հիմնարկություններ, որոնք սպասարկում են ոչ միայն քաղաքների, այլև ներհանրապետական շրջանի մերձակայքի բնակիչներին: Միայն որոշ խոշոր քաղաքներ կարող են միաժամանակ կատարել և՛ ներհանրապետական վարչական շրջանների, և՛ միկրոշրջանների կենտրոնի դեր: Սակայն շրջակայքի տնտեսական շրջանի հետ առավել կամ պակաս սերտ կապեր ունեցող ոչ բոլոր քաղաքները կարող են այդ շրջանի կենտրոնի գեր կատարել:

Այսպես, օրինակ, ներկայումս ՀՍՍՀ տարածքում ներհանրապետական տնտեսական շրջաններ կազմավորող կենտրոններ են Երևանը՝ հանրապետության մայրաքաղաքը և միաժամանակ Արարատյան տնտեսական շրջանի կենտրոնը, Լենինականը՝ Շիրակի տնտեսական շրջանի կենտրոնը, Կիրովականը՝ Լոռու տնտեսական շրջանի կենտրոնը, Հրազդանը՝ Սևանի տնտեսական շրջանի կենտրոնը և Ղափանը՝ Սյունիքի տնտեսական շրջանի կենտրոնը:

Եթե ներհանրապետական առաջին երկու տնտեսական շրջաններն ունեն պարզ արտահայտված շրջան կազմավորող կենտրոններ (Երևան և Լենինական), որոնք իշխող դիրք ունեն տվյալ շրջանների (մոնոկենտրոն շրջաններ)

⁴ Ե. Դ. С и л а е в, Производственно-территориальные комплексы, Баку, 1968, стр. 128—129.

⁵ Նույն տեղում էջ 123.

⁶ Ի. Դ. А л е к с а н д р о в, Основы хозяйственного районирования («Вопросы экономического районирования», М., 1957, стр. 213).

սահմաններում գտնվող մյուս բոլոր քաղաքատիպ բնակավայրերի վրա, ապա Լոռու, Սևանի և Սյունիքի ներհանրապետական շրջաններում չկա պարզ արտահայտված շրջան կազմավորող կենտրոն: Լոռու տնտեսական շրջան կազմավորելու գործում Կիրովականին օգնում են Ալավերդին և Ստեփանավանը, Սևանում՝ Հրազդանին նպաստում են Սևանը և Կամոն, իսկ Սյունիքում՝ Ղափանին օժանդակում են Քաջարանն ու Գորիսը:

Սակայն տնտեսական շրջանում քաղաքի կամ ցանկացած ուրիշ բնակավայրի դերը կարելի է հասկանալ միայն շրջան կազմավորող մյուս բոլոր ազդակները նկատի ունենալով: Դրանցից են ՀՍՍՀ ժողովրդական տնտեսության հիմնական ճյուղերը:

Բնական հարստությունները և առաջին հերթին հանրապետության տնտեսության ճյուղերի տեղաբաշխման առանձնահատկությունները որոշակի ազդեցություն են գործում ՀՍՍՀ ներհանրապետական շրջանների կազմավորման ու հետագա զարգացման վրա: Ինչպես վերը նշեցինք, քաղաքի տարածքային ազդեցության գոտին բացի ուրիշ ազդակներից կախված է նաև արդյունաբերության կառուցվածքից, այսինքն՝ առանձին ձեռնարկություններից, որոնք տվյալ քաղաքում ներկայացնում են արտադրական տարբեր ճյուղեր:

Քաղաքի տնտեսական ազդեցությունը շրջակայքի վրա կարող է տարածվել կա՛մ շրջակա տարածքի բնակիչների քաղաքի ձեռնարկություններում աշխատելու, կա՛մ էլ շրջակա տարածքում արդյունաբերական ձեռնարկությունների մասնաճյուղերի ստեղծման միջոցով: Երկրորդ ուղին ավելի նպատակահարմար է, քանի որ հնարավորություն կտա տեղում և՛ օգտագործելու շրջանի աշխատանքային ազատ ռեսուրսները, և՛ կնպաստի արտադրության համալսփ տեղաբաշխմանը: Դա կնպաստի քաղաքի ու գյուղի էական տարբերությունների վերացմանը, դրականորեն կազդի շրջակա տարածքի բնակչության կենսամակարդակի բարձրացման վրա, հնարավորություն կտա փոքրացնելու զանազան տրանսպորտային ծախսեր:

Սոցիալիստական հասարակարգի պայմաններում քաղաքը շրջակայքի վրա բարերար ազդեցություն է թողնում բազմաթիվ եղանակներով, որոնց ուսումնասիրությունը պահանջում է մեծ ջանքեր:

РОЛЬ ГОРОДОВ В ДЕЛЕ ФОРМИРОВАНИЯ ЭКОНОМИЧЕСКИХ РАЙОНОВ

М. Т. АКОПЯН

Резюме

При выделении экономических районов помимо других районообразующих факторов особую важную роль играют крупные и средние города. В советской экономико-географической литературе имеются разные толкования о районообразующей роли городов различного масштаба (крупный, средний, малый). В этой области значительная работа проделана Н. Н. Баранским, Б. С. Харевым, Е. Д. Силаевым и др. авторами.

Зона территориального влияния городов зависит от уровня их экономического развития, структуры промышленности, а также масштабности, интенсивности и устойчивости производственных и внеэкономических связей.

В настоящее время на территории Советской Армении в качестве районообразующих центров внутриреспубликанских экономических районов выступают: Ереван — столица республики и центр Араратского экономического района, Ленинакан — центр Ширакского района, Кировакан — центр Лорийского района, Раздан — центр Севанского района и Кафани — центр Сюникского района.